

*Les trois gloires Méditerranéennes ont obtenu le 2e prix de poésie  
aux Jeux Floraux Septénaires du Félibrige 1997*

**Pourtissòu**

Quouro sounjas en quaucun, i'a, tout d'uno, un image que vous enclaus. Mèste Reinié Raybaud, lou pouèto-vigneiroun de Sihoun-Font-d'Argens, n'es la simboulico d'un iéli dré e pur que nous fai trefouli.

Quiha au souleiant e segnoureiant la plano inmènso e soun vignarés, soun vilage nous encanto. Reinié lou pouèto, i'a avouda si forço vivo pèr gaubeja sa terro, e, fasènt soun obro, soun amo delicato laisso raja à bèl èime la melico de sa pouèsio vergeliano.

L'obro ternenco que nous semound vuei, es la frucho de si recerco apassiounado e menimouso, embessounado emé la sensibleta d'un ome que se clino, amoureux, sus tout ço que greio à soun entour.

Visionàri! Dóu gran de blad premieren à la seisseto, de l'oulivastre à l'òli fin; de la lambrusco au vin calourènt, em' èu seguissèn li piado di rèire, sis esperfor, sis enganamen, si vitòri.

Noste ami nous endraio sus li camin mie-terran de país fourestié, riche de civilisacioun esvalido que coungreïèron à cha un de biais nouvèu pèr ameïoura li culturo. Ié sian segur devènt di benfa de la terro.

Vous regracian, Mèste Raybaud, de nous agué enmara sus lis erso di counquistaire que nous aduguèron lou blad drud, l'ólivié testard, la galanto vigno. Gramaci de nous agué assabenta sus lou gran tant menudet, levame de nosto nourrituro, sus l'óli que englourio li recèto nostro, sus lou vin que nous encigalo.

Legissés aquèsti pajo de divino pouèsio e aurès lou sentimen que lou blad, la souco, l'ólivié, saran sèmpre la sabo inmourtalo de nosto Prouvènço tant amado.

**Jano Blacas de la Pampeto**